

Waziri Mkenda ashtukia jambo digrii udokta wahitimu wa nje

Na Augusta Njoji, DODOMA

WAZIRI wa Elimu, Sayansi na Teknolojia, Prof. Adolf Mkenda, ameipa rungu Bodi ya Tume ya Elimu ya Vyuo Vikuu nchini (TCU) kuchunguza ubora wa elimu na kutuma timu ya wataalamu kuhakiki tuzo zinazotolewa na baadhi ya vyuo vya nje.

Waziri Mkenda alitoa agizo hilo jana mjini hapa wakati akizindua bodi hiyo.

Alisema lengo ni kuwapa taarifa zilizosahili Watanzania wanaotaka kupeleka watoto wao kusoma vyuo hivyo kwa kuwa ni jukumu la TCU kuwezesha na kudhibiti ili ubora wa elimu usitetereke. "Lengo si kuzuia wanafunzi kwenda kusoma kwenye vyuo hivyo bali kutoa taarifa kwa Watanzania kuhusu ubora wa tuzo zinazotolewa na vyuo hivyo hasa vinavyofundisha masuala ya udaktari, nilishaongea na balozi mbalimbali si vizuri kuzitaja timu iende na Katibu Mkuu kuangalia baadhi ya vyuo vikuu duniani ili kuhakiki," alisema.

Alibainisha kuwa kuna baadhi ya vyuo vinafundisha udaktari kwa njia ya mtandao na kueleza kuwa hajui kama vinamwandaa vizuri daktari kuja kufanya kazi nchini.

Aliagiza wahadhiri wanaojiriwa ambao wana elimu ya Shahada ya Umahiri (Masters), kuwasilisha maandiko yao watu wasikilize.

"Kuna sehemu kubwa inatutaka kufanya ili kuongeza ubora, sehemu moja wapo vyuo vikuu vinafundisha walimu ambao wanakwenda kufundisha huku chini, halafu huku wanasema watu wanaohitimu vyuo vikuu hali si nzuri, kwa hiyo ni mzunguko kwa hiyo, vyuo vikuu ni muhimu kusimamia ubora wake kwa kuwa itakuwa ni chachu ya kusaidia kuongeza ubora huku chini," alisema.

"Kwa mfano tunapoajiri wahadhiri vyuo vikuu tusiangalie tu GPA tunaziamini, lakini kuna mambo mengi kuhusu GPA, tuwe na mahojiano, lakini na uwasilishaji lipo kwenye kanuni za TCU tusimamie.

"Kuna mtu alikuja kipindi kile nipo chuo kikuu akaja kuwasilisha andiko lake, lakini wakati tunampiga maswali tukajua huyu bogus (hana kitu), akaishia kusema ameandika haraka wakati sio kweli, alivyoondoka tukaangalia cheti amesema Norway na hana PhD kama alivyokuwa akisema."

Aliyakumbusha kuangalia suala la udanganyifu kwenye maandiko ya ngazi za elimu kwa wanaohitimu kutokana na baadhi yao kuanzisha ofisi za kuwaandikia watu.

"Napendekeza kwenu mfanye utaratibu wa kuchukua utafiti wao siku hizi kuna mfumo wa kutambua kama utafiti huo ni wa mtu, na ukipata hilo unatangaza kwa umma na aibu kwa chuo husika na msimamizi wa utafiti, unakuta mtu anasimamia watu 20 unawezeje?" Alihoji.

"Hizi ni salamu za vyuo vikuu tunataka hizi tuzo zihakikiwe, kwenye shahada ya Uzamivu ni vyema kuwe na utaratibu wa kutoa mawasilisho yao hadharani na umma usikilize badala ya watu wachache kujifungia kumpitisha kupewa tuzo ya PhD," alisema.

Mwenyekiti wa Bodi ya Tume hiyo, Prof. Penina Mlama, alimhakikishia Waziri Mkenda kuwa watatekeleza maelekezo yote aliyowaagiza na kufungua nchi kimataifa kwa kuwapeleka wanafunzi wengi kusoma vyuo vya nje ya nchi.

Prof. Mlama alisema bodi hiyo itahakikisha vyuo nchini vinasimama vyema kitaaluma kuhimili na kuyamudu mabadiliko ya kasi yanayotokea katika sekta zote za maendeleo binadamu, siasa, kiuchumi, kijamii na sayansi.